

皇明常熟文獻志卷之四

邑人管一德士恒編次

科第志

洪武三年庚戌科

張著 辛亥進士字則明

其先永嘉人元季避兵常熟因家焉初授陝西  
膚施縣知縣陞江西臨江府同知有治績卒于  
官所著有永嘉集長安唱和集易經精義其詩  
文清婉純正而間里月旦亦甚宗之不愧科名

之始子規有學行

唐溥 辛亥進士字彥博任陝西階州判官

鄒立誠 辛亥進士字九思居東始庄任陝西金州判官子貞應人材薦

黃著 辛亥進士字昭夫任監察御史

舊志洪武庚戌四公俱次年登第而其下係云徐士全榜進士然考明興以來諸科第志初無徐士全狀元而是科狀元乃吳伯宗也且伯宗榜亦無四公名豈革除間尚有舛誤耶今明倫

堂題名記每科遞書當必有據而亦書徐士全榜不知何說姑記于此以俟再攷

洪武六年以後罷科舉舉賢良至十七年復鄉試十八年復會試殿試後遂著為令

洪武二十年丁卯科

施顯 解元戊辰會元字孟微

初選翰林庶吉士授前軍都督府斷事又署北平按察司事坐累謫遠州踰年拜江西道監察御史卒于官公少篤學盛暑夜讀帳中帳頂皆

黑所著有兩魁遺稿子緒以醫名其後

桑氏爲其館甥 襲施姓嘉靖間僉事公

雨建兩元書堂于墓側而瞿公景淳爲記

洪武三十二年己卯科

黃鉞 庚辰進士字叔揚

初以庠生薦除宜章縣典史舉湖廣鄉試明年  
登第授刑科給事中進戶科左改禮科建文三  
年丁外艱歸公素與方孝孺姚善以忠義相期  
勉靖難師起姚善守蘇州督兵勤王爲麾下所

縛遂遇害報至公登琴川橋西向慟哭曰吾與  
君同受國恩國有難義同許身君今與希直同  
死吾忍獨生乎再拜祀善祀畢從容整衣冠入  
水死焉公有友人楊福具棺衾日夜泣橋側百  
方求公屍不得更數日屍忽自出立水中福痛  
哭抱起易衣體猶不潰竟成禮葬之君子謂黃  
公不負善福亦不負黃公死生不同其義一也

公今祀鄉賢 吾學編

姚伯善 字伯全

擢兵科都給事中永樂間同戶部尚書夏原吉  
治水蘇松後廣西採木卒于全州湘山僧舍逾  
五十年有孫榛旦暮悲感授徒積資屬其弟鶴  
迎櫬歸葬于常熟士林義之榛博綜傳記自號  
友荆居士

永樂元年癸未科

張信

字孟孚謁選得建寧府學教授是時用  
人不次陞國子監司業辭不拜乃授國子助教  
久之陞翰林院檢討卒于官公少有明經譽前

後居師席士遵其教焉

殷瓚

甲申科進士字廷璧

初任建德知縣縣在萬山中其民儉朴公始至  
問民疾苦平其賦役作新士類躬爲督課遷岳  
州府同知尋遷臨江府知府政事爲諸郡冠比  
歸行李蕭然至食貧以卒

鄧志係殷公于永樂三年鄉試而于甲科題名  
中又云永樂二年曾祭榜進士是先後倒置矣  
今正之

永樂三年乙酉科 鄧志作甲申科今正之

曹澄 字彥清常德府教授左遷餘杭縣訓導

陳寬 字叔裕開化縣訓導陞西華縣教諭

永樂六年戊子科 鄧志作乙酉科今正之

周冕 廣平府邯鄲縣教諭陞藩府教授

嚴敬 河南磁州學正陞某府教授

永樂九年辛卯科

魏謙 字伯恭曹縣教諭陞紹興府教授

楊伸 壬辰進士字孟舒號退菴居朱扈墩

授刑部主事左遷瑞州府推官致仕時二親俱

下恙公備極色養顏其居日頤樂堂父名福有

鄉望年九十二享祿養五十餘年

永樂十二年甲午科

唐敏 字志學歷浮梁寧津棲霞教諭文學典

贍所著有詩經鉤旨博古要覽寒碧歸田二稿

子元曾孫天恩俱舉人

袁方 戊戌科進士字子登任刑部主事

永樂十五年丁酉科鄧志失註

陳泰

任安丘知縣

陶安

號靖菴謁選得灤州知州治甚有聲所

部吏民愛敬焉載永平府誌入灤州名宦祠

連恭

亞魁字伯莊授湖廣寶慶府通判鋤強

扶弱人莫敢干以私卒于官年四十六孫憲族

孫璧俱舉人鑲貢生

鄧志誤書致仕歸卒今正之

永樂十八年庚子科

衛敬

山西文水縣訓導改儒居縣

冷融

字季和岳州府訓導陞樂陵縣教諭

宋紹興十八年有冷世光冷世脩兄弟同科進

士此則世光裔孫也

永樂二十一年癸卯科

魚侃

字希直號願菴登甲辰進士尋被命督

湖廣稅持心粹白蒞事詳練方岳重臣俱嘆賞

之外艱歸服除拜行在刑部主事越三載再丁

內艱服除改授工部主事隨總戎武公興都憲

王公宏提督漕運巡視江淮河道是時清河多

淺淤輒梗漕舟公奏置淺鋪夫時加疏濬運遂  
通撥淺置卒自公議始也仍兼理刑其軍民有  
兩造剖決無冤滯再陞刑部郎中仍理前政時  
公歷郎署已十二載遂出知開封府甫蒞任見  
府治後有包孝肅公祠卽薰沐祭告以孝肅忠  
謹名節自期開封轄州縣四十有二地廣民稠  
訟牒旁午而公以敬簡和平之政處之裕如是  
以吏懼而民懷政譽赫然起滿三載乞休居鄉  
做洛社故事與三四縉紳締爲耆年會每月九

日爲期卒年七十六

已上俱見  
墓誌銘

弇州續集云開封最號繁劇且俗羯羗不易治  
而公一切以惠文彈治之于上官無所阿私苞  
苴避匿不敢進且夕所御惟脫粟鮑魚菘菜而  
已致仕歸蕭然一肩貧無以爲養妻子不免饑  
寒而節操益勵臺使者有所餽遺不受旣病久  
困床褥家人以一甌粥啖之輒呼曰清官何不  
食肉糜竟死不能具寃窆後有錢公昕者官至  
布政使亦廉而故有父產時人爲之語曰富不

愛錢錢所貧不愛錢魚侃

按魚公廉吏載之史傳卽鄉評月旦亦無間言第當時御史章珪與公同朝相得甚驩晚而同結詩酒之社魚公卒章公撰志銘所敘記履歷甚詳而其食貧苦節絕不及一字不知何說

程式

字以則號可菴癸丑進士

初任南京兵部主事遷刑部員外郎以明允稱土木之變大駕蒙塵公扈從死難子出塞求屍不得僅以衣冠歸葬天順改元詔贈官

蔭一子嵩仕至延平府同知所著有兵政十策

施經衍義

程淳

此程氏發科之始後程宗工部尚書甲科程大廉程大經程蒙古程玉潤俱鄉科凡七人

王瓊

字廷璧任國子監學錄

宣德四年己酉科

沈諲

解元癸丑進士字希哲任吏部主事

葉詵

經魁字嘉言

初授河南商水縣教諭改永福縣

此葉氏發科之始後葉珍鄉科葉巒葉預甲科  
宣德七年壬子科

陳玘 字廷佩陝西金州學正轉湖廣彬州

高德 字以仁初授順天府寶坻縣教諭陞國

子監學正轉助教有文名與丘方季篋相上下  
子巽從子鼎俱舉鄉薦

朱敬 字克讓初授商水縣教諭轉西安縣

宣德十年乙卯科

周濟 字以政任府通判

唐元 敏之子山東鄉試經魁字首善初授順

天府訓導陞詹事府錄事官至金華府通判

正統三年戊午科 是科中式舉人八十名

呂困 第三名經魁己未進士號復菴居山北

初授行人轉監察御史巡歷湖湘以舉職聞遷  
湖廣按察司副使武崗徭寇竊發公會師討平  
之晉雲南按察使尋陞左布政使當遷時當路  
者政以賄成遣人諭意公不從遂罷其職所著  
有復菴集若干卷

朱驥

壬戌進士字漢房

元進士賓之後生而聰慧朗識鐵面鸞音總角  
為諸生周文襄公一見而大奇之為文精采雋  
偉讀書過目成誦嘗舉大明一統曆一周覽默  
謐不譌一字登第後值遼府藩王有喪被命  
往蒞葬祭還朝除行人遷監察御史憲囚淮南  
諸郡平反冤獄以千計其民尸而祝之再按求  
平苻處有滯獄株連百人者公訊而立決之人  
皆歎眼枯滌煩苛糾劾墨吏風紀肅然諫院為

之語曰朱驥手鍊剛口是時都御史李實以迎  
駕功被 聖眷獨器重公諸所奏記皆倚賴焉  
南陽李文達公執政而尚書金璉附麗之以意  
行其好惡公抗疏劾璉語侵李李不悅出公為  
廣西按察司僉事備兵南寧有土夷秦呂二姓  
以奪宗事聚黨相殺公聞于朝命公帥師討平  
之以功遷其省左叅議嶺表夷獯嘯亂安遠侯  
柳慶宿重兵鎮之師老財匱近無成功公條陳  
十策柳如其言遂大捷邊徼用寧 朝廷錄靖

常縣志 卷上 官職  
寇功遣使持 璽書金帛即軍前勞之公首與

焉有島夷數百人泛海值颶風漂舟境上守臣  
以爲盜欲悉誅之公獨議縱遣弗問夷皆感悅

都御史吳琛薦之行且柄用會以賀 萬壽節

進未過吳適中瘵疾暴卒年四十有六曾孫大

韶貢生 事見韓襄 毅公集

吳淳 文恪公孫字厚伯戊辰進士

擢監察御史理淮楊鹽法時文恪尚亡恙公被  
命暫歸省文恪怒其紆道而歸也杖之三十有

古名臣忠孝風公亦儒雅淳篤爲時所稱卒于  
官從子堂復舉進士

周中 由順天中式字大本任盧龍縣教諭

正統六年辛酉科

張懋 字時勉初授湖廣鄱縣訓導陞真定府

武邑縣教諭有文名所著有遜志錄歸閒集祖

衡以書法舉薦兩孫文麟文鳳俱舉進士玄孫

希仲貢生

此張氏發科之始自兩孫外有族人張京安進

士張學張仲孝張大受俱舉鄉薦凡七人

孫紀

號介菴南京吏部考功司主事陞刑部

員外子艾有詩文重名孫舟舉進士曾孫七政亦有詩文重名玄孫樓鄉科梓貢生

金聰

字時美任兵部司務

王蘭

字廷芳初任雲南黑鹽井提舉姻親魚

公侃謂之曰此官職司鮮清譽恐爲功名累公曰君能爲廉吏其獨不能自拔乎竟以廉能稱陞夔州府同知卒于官子詔卽魚公塔有高行

孫槐舉人

外有王瓊王留王評俱登科第邑有五王氏曰廟巷王曰南門王曰北門王曰古塘王曰山塘涇王而此則南門王也

陳璧

字仲奎號恤菴甲戌進士

初擢監察御史以詳錄稱出按湖廣瀕行冢司以地方切要五事委之歲滿還朝不報一遂謫長汀縣丞尋遷浙江按察司僉事職事修舉處那有銀課民盜爭久不息公往監之怙亂者不

敢動亾何免官歸家居多讀書弟某字仲器讀書吟詩有德望從子原洪貢生任山東東平州東阿縣訓導嘗謂人曰吾職銜連書三東字而生東吳又陳姓是五東也因號五東先生孫子忠舉鄉魁

邑有六陳氏曰縣前陳曰河東陳曰河西陳曰西門陳而此又游子巷陳氏也俱登科第外又有格樹陳

盧信

字心實居梅李初授鄭州知州憂歸服

除再授潼川州

錢昕

字景寅號遂高乙丑進士

初任監察御史時年甫踰弱冠獨持風裁出按浙江有勲臣舍人子虎而冠爲浙中患苦公逮至按考立捶殺之一省稱快還臺出知荊州府治尚寬簡廉靜民有頌德之誥進參政再遷左布政使蒞政清勤處已嚴介有尚書學篤老猶能連舉其箋疏詩文淳雅有則所撰誌銘類尤佳其清可比魚侃而楚藩推爲良牧伯

高祖名希祖仕元爲玉山儒學教諭曾祖甦號謙齋以理學見重于時嘗緣事繫獄有子迪年甫十八慨然請執政請代因得昭雪尋復應詔言事再撰祭元幼主文有云吾有天下還吾中國之所固有汝失天下棄汝朔漠之所本無上大稱賞欲官之以老疾辭別有傳兄錢昌錢曄俱有詩文名從弟錢昆錢璧從姪錢仁夫錢承德錢承業從姪孫錢璠錢有威俱登科第凡人

邑有兩錢氏曰奚浦錢曰祿園錢本一姓而此則沙溢錢也世有德行文學名

章格

御史珪子字韶鳳號介菴辛未進士

初任南京工部主事遷刑部郎中有當塗民盜官蘆者有司以劫盜論公讞輕之清涼門有吳虎者久爲民害公捕而格殺人稱快焉擢廣東按察司副使奉敕巡視海道會琉球夷人以番貨轉販他境遇風漂至香山徼吏欲盡戮以爲功公爲奏辨而遣之海道清寧遷雲南按察使

時本邦孟密夷相仇殺其酋曩罕弄尤桀驁邊境騷然詔下邊臣議公言夷係險相噬未易剪滅往者麓川之役得不償失可鑒也宜事綏輯徐圖進取國初待制王禕抗節歿雲南未有專祠公建祠祀之遷福建左布政使召爲南京光祿寺卿尋遷大理卿致仕公陟殿中外四十餘年再至九卿所至能舉職而不爲表暴以希赫赫聲歸田垂二十年熙怡鄉里間亡忤言傲色人稱爲長者卒年八十陰一子淦任府經歷

時縣令楊公子器構亭虞山上獨時時邀公登覽對酌名其亭曰仰高今蕪廢

章儀 御史珪長子字來鳳

初任平湖教諭陞荊州府教授晉兩京國子監助教連典京闈山西河南文衡致仕家居杜門不出澹于世味卒年亦八十

此靈公殿章氏發科之始親兄弟四人儀舉鄉薦表格律俱舉進士而表格律俱爲法卿俱在留都自是一時盛事又從弟度暨儀之子洗格之

孫榮又宗實俱舉鄉薦凡八人

褚璵 字廷暉初授汝州學正轉滄州陞興化府教授晉國子監博士三典鄉試文衡有清望卒年八十餘子圻舉進士

此福山褚氏發科之始後有褚祚褚圻俱甲科褚垠褚應韶俱鄉科凡五人

正統十二年丁卯科

吳琳 字潤夫由順天中式初授東平州學正轉霸州分考順天鄉試陞汀州府學教授念母

老解官歸天性孝友士論稱之亦攻古文辭

張汝昌 字仲光任大名府同知卒于官

徐忭 字公度任湖廣常寧知縣居西徐市弟恪工部侍郎或云與東徐同族弟東徐尚書公名棻與公嫌名相似不知何說

李毓 字廷秀辛未進士未除官卒

王儀 字叔莊辛未進士擢監察御史以言事謫南豐縣典史再陞三河縣知縣

朱鉉 字良玉號栗菴父亮以徭役居京師故

公由順天中式會御史員缺詔選用貢士公得擢御史巡視五城出按宣府諸邊城定占役法使人乘城守虜不敢闌入有入覲奏對失儀者公當劾不卽舉調桐廬知縣遂從京師還常熟居東河里 憲宗純皇帝卽位言官外補者俱召入公得再還臺隨奉命出按南畿徽寧等處值歲飢發粟賑貧民人皆德之以疾卒于當塗子紳字朝佩當公据要津有欲汲引之者紳固辭其高行如此孫召曾孫孔暘俱貢生

景泰元年庚午科

章表

御史珪次子字翔鳳號貞菴解元辛未

進士初與諸昆弟競爽而公獨久試應天不利曰必劉主靜典試吾其首薦乎主靜者劉公定之字也是年劉主應天試果發解旣登第初選翰林庶吉士學士高穀愛其文欲留之館閣公

固請他補遂出爲行人陞刑部員外晉郎中遷  
廣西左叅議時右都御史韓襄毅公討平藤峽  
徃賊築亭紀功而屬文于公文成韓奇之且登  
薦剡而公恃才傲睨韓不懌遂以大計罷其官  
居家喜事生產而居處踰度今所稱賽靈公樓  
與九瑞堂規制鉅麗皆他邑所無有鄉民張滸  
者受其虐具詞控御史臺御史以法裁之遂失  
勢卒年七十餘其人志銳氣剛崖岸壁立其文  
鍛鍊精工一洗俗套而出于奇古模擬樊宗師  
有集若干卷而詩不如文

蔣綬

字洪章號無碍甲戌進士

初以御史員缺公遂得被擢庶事詳練時忠國  
公石亨有母殯朝士俱縞素送之公獨不預被  
色服騎而過亨怒譖公于左都御史李實黜公  
爲吉水知縣再改光山縣俱以舉職聞是時大  
冢宰王公鞫雅知公擬爲大理屬有寺長宿憾  
公不果用遂解職歸家居簡出覽羣籍發爲  
文辭莊密蒼古書法趙孟頫所著有無礙等集

弟績子鈍俱舉鄉薦從子欽舉進士爲忠臣又有陳潛亦蔣姓鄉科凡五人邑有兩蔣氏而此則居青菓巷者也

程宗

式之從姪字原伊號希軒辛未進士

初任刑部主事晉員外郎分考會試廣昌有大臣當英廟復辟畏罪自盡仇家陷其子以謀殺久不決公往讞自之物論稱快陞吉安知府吉安故號難治而公以端方蒞之濟以寬厚治績稱最外艱歸服除補真定府以病未赴再補

武昌府尋陞四川叅政晉陝西布政使有聲望

擢右副都御史掌都察院事出巡撫陝西會洮

州西番滿松等族不靖公偕鎮守總兵官率師

征之遂平俄而謀報北虜入寇公復振旅北伐

陳師慶陽虜知有備引去亾何夷虜再犯榆林

公至綏德聞母喪馳歸服將闋會木邦酋長罕

竈法孟養恩六與孟密曩罕弄母子累歲相仇

殺罕竈法陰遣頭目通于金齒太監王舉乞兵

征孟密且啗以利舉言于鎮守太監覃平黔國

公沐琮巡撫都御史吳誠同奏其事請調漢兵十七萬討之 詔付廷臣議僉謂孟密險遠用兵非便宜遣大臣詣曉夷情者往諭之 上乃特命公卽其家賜以璽書而行公被命馳至雲南與撫臣總戎聚議衆議紛然公曰吾奉朝廷敕諭止云撫輯不云興兵也乃馳至騰衝所過五十三叅山危石巉然欲墮人馬從石罅行再至南甸曩它法迎拜道左請以孟密隸木邦公折之不許而曩罕弄懷疑三四進退公再過大小南牙山懸崖峻坂與從者皆匍匐而進遂直抵其地曩罕弄來迎公責其擅相攻擊之罪仍宣諭朝廷撫輯至意皆頓首服乃具奏遂檄木邦以所侵寨歸孟密立木密安撫司隸雲南布政司緣此羣夷相輯睦是役也說者謂不遺一矢不血一刃而諸夷三十餘年怨忿俱消遂進公左副都御史仍巡撫雲南踰年召還陞刑部侍郎再陞南京工部尚書食一品俸而當路者多忌之會有蘇某者謗公于朝謂嘗入夷賂

上命御史覈之無實遂請致仕卒年六十八蔭  
一子恩所著有宦遊集撫夷集歸田集又奏議  
十二卷

今按田汝成炎徼紀聞凌氏萬姓類譜弁山堂  
家乘考誤與此大不相同然公神道碑是徐文  
靖撰撫夷錄序是何喬新撰詩集序是李文安  
撰載辨甚詳明三公當非飾說者

湯洪

字宗範任江山縣訓導陞和州學正初

治尚書學提學御史彭勗稱爲江南經學第一  
博覽彊記人以書厨目之後以嗜書攻苦得目  
瞖卒年八十餘無子

陸泉

辛未進士字孟昭居太倉衛城

初任刑部主事晉至郎中能以文學飾吏治性  
仁慈時有所寬貸其視獄日多蓄猫于獄以辟  
鼠害囚之重繫者得毋傷死兩按河南山西大  
獄俱稱明允久之轉福建右叅政首捕舶商之  
行剽于海者僂之繕理戍城及甲仗一新又築  
漳泉二郡海隄海不能侵郭閩人服其感惠居

恒不問家人生產而所至卽官舍或僦居必小  
飾齋室蒔花竹時戒內子儲名醞甘泉珍錯以  
待不時之需客過必留留則咄嗟立辦至卜夜  
而猶未已緣此得豪俠聲曾孫瑚仕爲御史至  
知府亦有公風

兪州續集

沈顯

字德輝

繆樸

辛未進士字尚質以經學名

初授行人司行人進司副遷南京刑部郎中精  
于法比嘗有坐重法者冀得免使人以燁鷲爲  
餽中實以金公覺而發其事寘之以法年踰六  
十致仕所著有草窩集

此新巷繆氏發科之始後有繆鈍繆尚志繆中  
孚俱鄉科

楊集

甲戌科第八名會魁字浩然號東溪

時禮部郎中章綸御史鍾同上疏請 景皇帝

朝 上皇于南宮復 沂王爲皇太子 帝大

怒下詔獄公時觀政兵部上書于公諫王公文  
請救之詞甚伉直文曰此書生不曉事然有膽

氣當進一級處之遂除安州知州我朝進士選  
州守自此始公至州理荒政馬政俱能紓民疾  
苦有貴戚奏求莊田內臣出畝畿郡所過殘暴  
公皆力爭之會同事坐法事連公亦下詔獄去  
官公以高第出刺方州少年盛氣峻其崖岸頗  
忤物情蓋晚而懲艾始務謙抑游心經史謝遠  
世故卒年七十八子舫舉鄉薦孫儀舉進士

公少時早呼黃生門術士袁忠徹聞其聲而奇  
之既見其貌謂曰以子之聲當位極人臣名滿  
天下而惜貌不稱官不過五品然聲自洪遠子  
孫必有興者又謂黃生曰此兒亦不凡後當七  
品後公果仕止州守而三世科第接武黃生者  
名式以歲貢官至知縣忠徹之神鑒如此  
事見憲章錄及高坡異纂

章度 表之從弟字虞鳳初任汝州訓導轉武  
邑縣陞閩清知縣再任建始縣

張厚

字文博安州學正

景泰四年癸酉科

是科中式舉人二百五名

湯珠

第二名經魁丁丑進士字譽寶

初授刑部主事晉員外郎遷廣西按察司僉事  
有清強之譽少敏悟絕人摛文頃刻數百言長  
而性剛褊好攻人過惡面斥不少避人皆嚴憚  
之與寒峻交時致溫款視顯貴蔑如也邑有錢  
擘者以輸粟得官富傾一邑而豪侈擬于王侯  
居鄉多不法事郡守楊公貢欲按之不得至各  
具疏詰奏由是貢與擘皆被逮朝審時天寒甚  
擘賂緹騎嚴縛貢而擘得寬因此貢詞不勝刑

部復徇請托論貢與擘各削籍爲民吳人寃之  
公賦一詩紀其事累千餘言吳中傳誦擘亦內  
愧值公以主事還具腆儀來訪公方對客賦詩  
豪飲辭弗與見隔屏厲聲謾罵曰若故銅臭子  
沐猴而冠魚肉鄉閭者平時不相識今乃爲刑  
部主事來乎擘羞縮無地所著有梅花牡丹各  
百咏傳于時孫繼文舉進士

事畧見舊志而楊循吉記之甚詳

章律

御史珪季子甲戌進士字鳴鳳號容齋

初授刑部主事晉至郎中遷保定府知府保定  
最爲雄劇郡多豪不易理而公處之斤劑理解  
遂以吏治聲表三輔初其父御史公忤其臺長  
見黜而是時當公所治其長已物故而家籍勢  
猶橫會坐事人謂公且甘心焉公歎指其坐曰  
此三尺地也而吾敢修先人之怨乎卒從正法  
遷雲南右叅政時安南遣使入貢欲取道臨安  
公以非故道拒之且言夷情叵測其假道安知  
非覘我虛實不可許外艱歸服除改廣西進右

布政使荔浦獐賊竊發公帥泗城兵由象武路

扼陳村口以當賊衝遂擒其渠魁捷聞 賜勅

獎勵轉貴州左布政遂進右副都御史巡撫雲

南其在雲南也與巡按御史不相善會其人以

考察黜而公遷南京左副都御史理院事遂具

疏許公受夷賄俱檻致廷尉按驗不盡實御史

謫佃塞外而公得冠帶閒住公在事風聲凜凜

遠近肅然所著有春澤文稿若干卷 金州續集

唐冕

字尚周常山縣教諭陞衛輝府教授

陳問

字裕之任南昌知縣

曾珍

字時寶由歲貢順天中式任西安知縣

顧齋

字希高任大名府通判

桑瓊

由歲貢順天中式字廷瑞號鈍齋授中

書舍人卒于京

此桑氏發科之始兄弟五人長瓊次琳次玘次瑾次瑜中瓊瑾瑜俱舉鄉薦琳之子悅瑾之子翹次介介之子大協亦俱舉鄉薦最後玘之曾孫雨舉進士雨之子元萃亦舉鄉薦奕奕稱儒

族英第科甲九人而五人俱爲別駕亦奇事也  
景泰七年丙子科

顧以山

丁丑進士字安道監察御史陞河南按

察司僉事歷官叅議副使叅政今割隸太倉

朱仁

字元復由順天中式初任光祿寺署丞

轉寧夏衛經歷

盛汝德

由順天中式

徐恪

忭之弟丙戌進士字公肅

初任工科給事中會 慈懿皇太后崩梓宮神

主祔禮中人有異議公上疏論之哭于庭

憲廟嘉納卒成禮 昭德官方承寵震位尚虛

妖僧劄實巴以其法惑衆人無敢言者公抗疏

論之時閣臣兵部尚書某禮部尚書某以度僧

濫殺贖貨公復與同列論其罪直聲震朝廷久

之出爲湖廣左叅議分守湖南道居九年晉河

南左叅政職理戎籍嚴而不苛軍民稱便有藩

王請開封數邑無地公以法爭之不與因援山

東河南洪武二十七年後新墾田地不再稅議

上戶部 上竟予公議晉右布政使尋轉左歲

大饑省臣慮流民爲亂宜逐之出境公曰是速

之亂也議停漕粟數萬賑之期以明年秋熟還

所負先發後聞 上可其奏遷都察院右副都

御史仍巡撫河南多所論列知無不言言無不

盡藩府積爲公所持有奏訴于朝 上以書諭

王改公巡撫湖廣有白金文綺之賜其在湖廣

興利除弊一如河南陞南京工部侍郎譽望益

尊有巨璫宴會倨傲無禮公引主客禮責之其

氣遂折以年至乞休屢疏方得請 詔馳驛歸  
卒年七十三常以主一自命學者稱爲主一翁  
有集三十卷奏議二十卷今從祀子游祠

公父名訥博學有高行居家訓迪子弟必依于  
忠信孝友有萬石君之風子縮淹記國典以襟  
量聞綖亦有士行孫瑑以任子爲西安縣丞

桑瑾

瓊之弟由儒士中式字廷璋號淪齋

謁選得處州府通判麗水松陽二邑間故有通  
濟堰蓄水可灌輸數千頃一夕爲震霆擊破公

修復之民賴其利又嘗捕巨寇有功秩滿當遷  
遽引疾致仕公孝友之行可方古人嘗以親不  
逮祿養終身自奉儉薄不受宴賀其需選吏部  
後其弟兩月而拜命同日出都門其並致仕亦  
同日還故里高風雅操矯矯不羣所著述甚富  
不可殫記卒祀鄉賢門人錢仁夫輩私謚曰淵  
靜先生

盧棕

字彥貴任海陽知縣有廉操嘗平反死

罪二十人以直道忤其守罷官子翊舉進士

天順三年己卯科

錢璧

字應章任荊州府通判昕從弟號守菴

孟怡

字友和任河南鄭州學正

桑瑜

瑾之弟字廷瓚號檢齋

謁選得温州府通判其治尚寬不忍輕用敲朴屬邑泰順有銀礦歲久礦微官取盈額民多破產公白于上官遂得奏減瀕海有地名蒲莊設二千戶領卒備倭卒侵奪民田民累訟不決公被檄往勘籍其畝定其稅民大悅温有鹽竈戶

多逃亡課坐是虧部臣議以三丁充一丁竈戶

携老幼泣訴于公公曰此有舊額在爲言于戶

部從其言自是兩浙南北直隸俱用舊額以徵

課元儒史伯璿墓久廢公訪而復之謝靈運守

温有夢草池公作堂其上兄瑾來自處州相與

會合觴咏尋致仕公風神夷散趣尚澹泊兄弟

俱有山水之好每風日佳霽必出游游必有篇

詠所著有吟窻選粹四卷續集八卷又嘗修常

熟志若干卷

褚祚

壬辰進士字昌胤居金山

初任浙江臨海知縣究心于政事得其利弊輒興革之不遺餘力縣有嶺途兩三日淖陷則薪米斷絕公發工庀材治之邑人名爲褚公嶺擢監察御史理京畿馬政革其隱弊俄卒于京師貧無以爲歛其同年吳文定公寬歛之父名國蕃有高行

李傑

時年十七登丙戌科進士字世賢號石

城初選翰林庶吉士授編修進侍講時 孝廟

在東官公充講讀官滿考遷侍讀學士以春官恩進兼左春坊左庶子掌坊院事弘治初充經筵官纂修 憲宗實錄遷南京國子監祭酒加祿俸憂歸服除改太常少卿兼侍讀學士修

大明會典充副總裁時 武廟在東官公再充

講讀官孔廟災遣祀闕里還朝遷南京禮部右

侍郎入爲禮部左正德初纂修 孝宗實錄爲

副總裁遷南京吏部尚書明年召爲禮部尚書

時逆瑾亂政諸臣多望風承旨公獨無所附麗

有晉府鎮國將軍賂瑾求封郡王公不與瑾銜之遂致仕歸公在翰林時乙未辛丑甲辰凡三爲會試同考官己酉壬順天鄉試屢受殊賜初以應制賦詩稱旨有寶鏹之賜再以經筵有白金文綺之賜再以南京祭酒賜金幣加級俸宴勞而後行再以禮部尚書有玉雕麒麟帶之賜生平高簡自重不爲翫散以故在翰林最久號爲淹滯而其任常伯也亦不得中貴人驩迨逆瑾誅名爲且召之實不召也卒年七十贈太子太保謚文安蔭二子而進仕至刑部員外郎遇雨雄知府所著有石城集若干卷書法道逸有黃米之度

弇州續集贊曰簡簡文安國之老成澹以自藏矜而不爭我懷伊人亡愧易名

王鼎 己丑進士字元勳號銘菴居梅李

公少有至性十歲作聽琴賦詞甚工弱冠舉進士授南京刑部主事精法比有京衛指揮抵重法賄囑尚書求移獄尚書召公諭意公不從晉

郎中遷湖廣布政司左叅議究心荒政民以災  
訴者遽下有司覈之通融調補以充糧運豪猾  
有作奸犯科者立杖殺之藩府預借祿米歲以  
爲常公持不許故事湖藩諸道有隸役銀爲上  
官潤橐公亦移文止之再遷廣東左叅政總督  
根餉裁冗費剔弊孔甚多與都御史閔珪不相  
能遂罷職公素與南臺御史何舜賓善何以事  
謫戍邑令鄒魯與何有郤械何赴戍使人于途  
中殺之復欲滅其家以杜後患何之子莚挈家

宵遁歸公公誓與之復仇會魯擢山西提刑公  
探囊以二百金遺莚授之計莚乃得收死士潛  
行抵邑伺魯出次江干以死士爲聲援手捽魯  
下車痛毆之盡拔其髭髮戮其兩目事聞兩浙  
騰沸因訟寃 闕下有 旨命郎中李時給事  
中李舉會按臣鄧璋審勘乃擬魯故屏人服食  
至死律莚以鄙民毆本縣官篤疾律俱絞餘所  
逮數百人論罪有差公前後遣偵者相望既聞  
莚論死則復資莚母入都擊登聞鼓上訴而魯

亦令人訟枉有 旨命再覆勘乃擬魯論斬而  
引唐梁悅報父仇例擬魏戍邊正德初放還天  
下皆稱魏之孝而高公之義浙人撰劇戲名曰  
湘湖傳公又嘗以水災上書都御史得奏免歲  
徵十六萬云所著有銘菴集若干卷工于詩刻  
去宋元以來纖靡之習可稱超乘子訪善詞翰  
以性行稱

何魏者蕭山人徐昌穀嘗紀其事謂魯嘗飲一  
玉杯一夕杯忽自躍墜地而碎次日難作後百  
餘年而有董進士光宏立傳謂非王公義士不  
能成孝子而吾邑嚴太守澂爲之刻石

天順六年壬午科

瞿俊

字世用號學古己丑進士居五渠

初授江西崇仁知縣擢監察御史巡按江西舉  
劾不避權要治賍吏無所縱舍遷廣東按察司  
副使兵備海南當公蒞任時薄暮憇一察院從  
官白院中有妖怪不可處公不聽燃燭置勅手  
握鐵章危坐以伺夜半空中有聲如驟風雨已

漸狂猛公堅持勅印不動聲漸微久乃漸滅公亦無虞次早周視院中有一大榕勢極雄壯隨斧伐之怪遂息公律已嚴峻人不可干以私鄉有巨室子薄游謁公于官公飲食之處其骹法命官傳送出境卒死道中在廣東出見市箒者呼而入分箒給諸僚有僚篋篋不飭倍給之問故公曰居庭多穢耳僚捉硯擲之公被傷自江右還朝縣令祝其裝百金獻之公大怒峻却居家徒四壁立舍傍有地自操耒耜治之比舍皆

漁戶時時就之席地飲脫巾漉酒淋漓宴酣相爾汝每入郭率晨候漁耕小艇歸仍附之其坦率如此善爲詩高雅超脫所著有和蘇江月韻爲時所稱書法學宋仲溫後祀鄉賢今建專祠扁曰廉頑立懦

喬孫曰陸  
爲奉祀生

此瞿氏發科之始後瞿明瞿景淳瞿汝說俱舉

進士

凌祀

字尚忠居穿山初任湖廣崇寧知縣轉

江西彭澤縣

周紹榮 本馬姓字宗勉號景范有巧思善楷書

成化初與周浩汝訥李應禎吳璠試中書選預修英廟實錄授中書舍人直文淵閣陞吏部

驗封司員外陳情復姓予告還家弘治初取修

憲廟實錄遷山東左叅議再以實錄功陞太常

寺少卿居官三十年以清謹稱 憲宗朝嘗有

急敕夜宣館中館中人盡醉惟公得奉詔簪筆

上殿書麻稱旨同官得無究明日諸公皆賦詩

賀其居內閣最久與永嘉姜立綱齊名姜善子

昂公善宋克爲一時宗其陞少卿也立綱以出

身布衣不得齊官公往告銓部願損一級與立

綱齊故馬得太常姜得太僕朝論益賢之卒于

官 上遣官營葬諭祭益異數也墓在吳縣楞

伽山子孫亦徙居焉所著有紀盛詩集與李學

士傑錢郎中仁夫相唱酬

初公爲周氏養子後入中書繼娶張都督女封

恭人與永新劉公定之爲聯襟有女適興安伯

徐盛恭人與其女歲朝 坤寧官備承榮遇比

其卒也貧無以葬又一女適翰林孔目蔡羽卽  
林屋先生

葉珍 字敬儒任浙江慶元知縣 孫元貢生

陳易 字一元號柘菴居文村

初授建昌府推官問遺無所受請託無所聽精  
于吏職善爲鉤距以得事情遷黃州府同知職  
清戎籍得隱丁無筭隣郡有劇盜二千石莫能  
禽制聞公治行棄仗來降廣昌有虎患公移文  
于神逐虎虎遁去冢宰王端毅公廉其治行將

擢用之公以母老力請致仕先是治廣昌時民

有爲子聘婦而子久商于外數年不歸者婦家  
有怨言父聽其別嫁比子歸則父已歿而婦別  
嫁者已生育矣伊子訟于官公竟斷歸原夫婦  
與夫妻母子痛哭不忍割相率赴水歿凡五六  
口公始大悔比居家感疾日中時時見冤鬼遂  
忽忽無聊以卒天性孝友居家有儀範所著有  
柘菴集後祀鄉賢于俸博學有士行

父名詰號雲崖有高行事見恩綸志嘗著居官

一覽子遵行之遂稱循吏後亦祀鄉賢邑中父  
子入鄉賢者惟二陳氏陳播陳逅又陳喆陳易  
聞鑑 字理明任四川榮昌知縣

此聞氏發科之始弟釗舉進士子韶次武俱舉  
人武之子東昌舉進士三世凡五人而位俱不  
顯又有聞樟者亦聞氏甥鞠于聞氏故蒙聞姓  
吳璋 居十里鋪居鄉暴雷里人籲天詛呪之次  
年會試貢院災璋焚死旅襯至黃河舟覆復沈  
溺焉人謂有天道云後贈進士

蔡玖 字德昭

唐韶 冕之弟字尚虞乙未進士居雙鳳初授蘭  
谿知縣政績赫然擢監察御史卒于官子符自  
分州後由太倉舉進士亦爲御史有聲而韶父  
瑀由典史贈御史故其家有三世繡衣坊

邑中父子進士九家見盛事志若父由常熟籍  
而子由太倉籍者又兩家唐韶唐符朱稷朱沈  
沈瑄 字廷璧號清軒居支塘登甲申進士時年  
二十四連丁內外艱初選大理寺評事有清堂

尋卒于京行李蕭然殯歛不給年僅三十四

蕭奎 字漢文號靜菴居河陽由歲貢順天中式

亞魁壬辰第十四名會魁

少篤學攻苦人弗能堪遂博通群籍于時執尤  
工舉進士授工部主事被命往淮安督造糧艘  
以廉惠稱還朝再被命董修太倉與巨璫蕭敬  
共事敬有所乾沒公以法裁之京師以廉貪分  
二蕭晉員外郎兼領神木廠有太監顧雄者  
嘗事 憲廟于東宮命監軍北邊擅杖一大將

死坐罪當誅

上特宥之得減死斥居殿中他

日廷議復用雄公上疏論之謂蠹法之奸不可  
復用雄泣訴于上衆皆危之而公自若銓司擬  
公雲南按察司僉事提督雲貴學政不果復改  
理刑未上卒公在京素與御史褚祚中書凌遠  
善二人卒于官公爲之歛護其柩以行仍輟已  
舟載其柩其高行多類此

此蕭氏發科之始後蕭塾蕭繹蕭晨俱貢生蕭  
應官舉進士

李粟 由歲貢順天中式字翼寬居李市

公以貢入京師有蜀人陳清者以倉官秩滿留京師適緣事坐法當刑其子寵年方十四請代父死繫獄公憐之為之營救費白金三百餘兩朝廷嘉寵孝併赦之後清補崑山縣丞崑山去公所居僅一舍耳而公絕不往清以疾告歸願以女侍公公曰以財濟人而入其子女非人也固却之復以金資其行夫却女非難也難在一書生逆旅輕千金非有相知之素而脫人于纒總較之晏子脫越石父固為過之後謁選得處州府通判子嗣賢亦舉鄉薦

成化元年乙酉科

劉竑 亞魁字以規號毅齋居穿山

初任縉雲知縣廉明有為考最陞真定府定州知州外艱歸卒從兄倣以義俠稱于吳中從弟倣舉鄉薦珏由長洲籍舉鄉薦又族孫布由長洲籍舉進士

桑悅 瓊之姪字民懌號思玄居穿山

公才高一世氣凌千古父老傳說其事甚多不能具載今按藝苑卮言再叅家乘邑志聊爲記之公家貧無所蓄書從肆中驚得讀過輒焚棄之敢爲大言時銓次古人以孟軻自况原遷而下弗論也而更非薄韓愈髻年補諸生部使者下邑公前謁之書刺江南才子桑悅使者大駭已問知公素延之校書而預刊落以試公公校至不屬即索筆請書無誤使者大驚服年十九舉鄉試再試禮部時丘文莊公爲考官閱其文

所作學以至聖人之道論有我去而夫子來等語又射策中有胸中有長劍一日幾迴磨等語丘縮舌曰得非江南桑生耶大狂士黜之名落乙榜例當出爲廣文時年方二十九籍誤以二爲六用新例辭不許遂得江西泰和訓導嘗創獨坐軒憇憇其中日取前言往行大加褒貶以定萬世之是非自言天壤間坐予坐者寥寥故謂之獨一分試湖廣兩總試浙江雲貴所取率多得人謁見諸監司多倨傲無屬吏禮謁學憲

而長揖不跪謁御史而跣足爬垢然御史尋復薦之遷長沙府通判爲文吊屈原賈太傅人傳誦焉嘗攝茶陵州事監司以糧訟繫獄者數百人時大疫多瘕歿公不俟按報悉縱出之謹呼載道滿三載以催科無績再調柳州府以恩信撫民夷柳人繪像祀之修蒼梧府誌是時總制兩廣中丞鄧公廷瓚禮致幕下以賓師禮之資其謀畫歲餘外艱歸修太倉州誌然家益貧落杜門著述如六經語孟俱有訓詁門生故舊來

宦吳者多問遺之隨手而盡卒年六十五葬于穿山無子公喜莊騷家言特長于賦嘗著京都留都中都三賦欲進 御覽不果其詩文有晉人風度而行楷亦宗晉人草書流暢法懷素所著有思玄集數十卷

公曾祖名宗道號野雲道人有道術鄉閭俱嚴事焉父名琳號鶴溪博涉文史所著有蔗鄉雜詠鶴溪集

戴昌民 字商佐南宮縣教諭陞衛輝府教授

沈海

由儒士中式登丙戌進士字觀瀾號葵

軒初居橫瀝塘凡再徙而居邑之南門既壯猶雜處齊民間年且四十鵲起聯登科第初授刑部主事精法比晉至郎中遷泉州府知府始至摘發偽造倉印二十三顆人皆股弁歲亢旱公禱于天有願損十年壽化為三日霖之語兩遂澍應內艱歸服除再補四川重慶府考最當遷以年致仕家居好讀書所著有葵軒遺稿生前預營壽藏而乞李文安公為墓表

是時文安與陸太守潤俱公同年俱致仕家居因結為三老會時觴咏焉望見者稱為神仙公敦厚周慎富于經術卒年八十五

此南門沈氏發科之始子韓孫應魁俱舉進士孫應元曾孫汝為俱舉鄉薦四世凡五人

陸潤

字昌澤號古松由儒士中式登丙戌進

士初奉檄徵料淮鳳還朝選閩縣知縣閩多訟訟公執一二置于法風遂少沮番使入貢者徃時多濫給餼廩公為計口以給裁省甚多內艱

歸服除補山東清平縣遷太僕寺寺丞革私贄  
立清法馬政一新嘗部本寺銀二萬有奇給寧  
夏等邊軍互市有羨餘四百兩故事應供使者  
公亦入正數給發余少保子俊聞而嘉賞之擢  
溫州知府溫有銀冶盜時竊發公嚴法緝捕革  
歲役餘剩之姦清攬納稅糧之弊修築石堰百  
餘里以捍潮汐而東甌湯王廟文信國公祠謝  
康樂亭池皆與修葺瑞安沿海巡司併守禦所  
爲倭所劫撫臣彭侍郎韶欲以矢機論公曰原  
無城守而印信不失大衆無虧罪止不應彭是  
其議滿九載中書語罷歸家居足跡不履公府  
卒年八十三

此東門陸氏發科之始子隆恩曾孫一鳳俱舉  
鄉薦一鳳之孫榮禮問禮俱舉進士

公與沈公濠嫌名从水同由儒士得雋同乙酉  
丙戌聯第同仕宦以郡守終同肩壽八十餘同  
奉詔晉階三品同子孫四世科第同三進士二  
舉人同而一稱南門沈一稱東門陸俱爲世家

初始甚奇

徐綬

字宗章初任湖廣石首知縣轉福建上

杭縣

孫育

字方伯居珍門涇任韶州府同知曾孫

章有成舉鄉薦以從外祖姓故蒙章

屈輜

號務菴任瑞州府推官 孫必達貢生

許昕

字實東少有才名後任山東掖縣知縣

政尚寬簡掖人懷之母年及九十請告歸養日以詩書課子姓以耕稼課僮僕闕舍傍隙地爲

園扁曰城市山林有花竹魚鳥之致

郁容

字弘德號見菴甲戌進士其先世業醫

初授刑部主事精于法比然性寬厚多所平反都御史秦紘與安遠侯柳溥聚訟于朝刑部尚書何喬新屬公讞之竟直紘而抵溥于罪後公至南都而秦已爲戶部尚書公避不往見秦益重之晉員外郎御史李興以濫刑繫獄巨擘楊某欲坐興與公據法爭之得未減楊中公以罪遂調撫州府通判遷澧州知州澧俗刁悍豪右

多扞文罔公治之不少假弛征薄賦澧民德之  
陞雲南按察司僉事行部多產金故事每銷礦  
金戶率有例入公禁絕之蠻夷阿則聚山谷作  
亂公被檄討之以計散其黨與竟成擒論功當  
獲賞會丁內艱歸其行裝不置南中一物以廉  
潔稱所著有文集遺集數卷

邑中稱郁家門樓者此爲發科之始子勲舉進  
士姪孫迪又選俱舉鄉薦又江陰郁文周子郁  
廷芝俱舉鄉薦亦其族也

成化四年戊子科

雷翀

字鳳霄任彰德府通判卒于官其先江

西南昌人族甚大父任常熟大使遂家焉

瞿明

俊之從弟字德昭號若匏壬辰進士居

五渠初任工部主事陞兵部武選司郎中

蔣岳

字時秀號企菴少苦志篤學後謁選得

汝州知州卒年僅四十六曾孫以忠塞進士以

化舉鄉薦

鈕天錫 叅政衍之後裔字昌胤初任商水縣教

諭轉永豐縣典福建鄉試陞翰林院待詔

高巽

德之子字良順有窮經之學任潼川州

同知民樂其簡靜以疾卒于官

繆鈍

由歲貢順天中式字魯之任丘縣教諭

成化七年辛卯科

高鼎

德之從子字良新任歸州知州州在巴

峽間地僻而民頑公有撫馭才廉靜而善斷治

聲蔚起卒于官初爲遺腹子母鄧氏鞠之蓋年

二十二而娶八十三而卒以完節稱

董彝

字克明壬辰進士任徽府長史

吳源

字宗本

錢昆

昕從弟字允熙任永安知縣卒于官家

有花竹臺榭之勝可以銷夏却暑

周惠

字元澤美丰儀壯有雋聲初任台州府

通判士民稱之陞紹興府同知裁決明允庭無

留滯以病致仕卒無子詞令嫺雅有醞籍風喜

爲詩亦工八法

秦蕃

字良翰乙未進士居陸河任浦江知縣

以失劉瑾歡罷官瑾誅事甫白尋卒年僅三十

任順 字叔順居釜山任定海知縣改鉛山

錢承德 昕之從姪字世恒號 裕軒乙未進士

初授阜平縣知縣平山贊皇有二滯獄自公決  
之擢監察御史巡北城兼九門出稽兩廣錢穀  
又理山東鹺法巡視河道值朝叅失期被劾左  
遷健爲知縣縣境連馬湖有鹽井北山竈丁頑  
悍負險不服有所徵歛不應公選耆長諭以禮  
法俱服從丁外艱闋遷知蘄州復以母憂服闋

改知冀州擢山東按察司僉事命督京衛真定  
河間德州天津各衛屯田尋遷副使飭理密雲  
邊備兼永平府衛屯田訟牒邊關堡障修其廢  
壞以勘獄事降雲南新興州知州遷福建鹽運  
司同知再以勘獄事罷職公所至持風裁不爲  
翫散取容以故數起數躋豕構西園有奇石五  
名爲五老峯又有放盆池沁雲亭等諸勝日與  
名賢董觴咏其中而與從兄仁夫唱和尤多有  
五峯集若干卷詞旨清美亦善楷法卒年六十

四無子

父昌以詩名同時三兄弟爭華競爽而仁夫承德繼起名尤著

張學

懋之從弟字時學號景陶居支塘篤志

于學夜無膏則映月讀之治毛詩學爲三吳絕唱後游南雍三原王端毅公特撫南都遣子承裕受業後承裕仕至戶部尚書當公謁選時端毅爲大冢宰公絕不往謁冢宰亦竟無所徇僅得浙江遂安知縣邑有豪黠坐罪公以法裁之

豪誣奏公詔獄豪坐誣公得白出之由是邑豪歛迹嘗條便宜數事上巡按御史吳道夫得通行浙省監司署爲循良以二親年高竟致仕卒年八十一子京安舉進士

葉預

字誠之辛丑進士居沙頭任光州知州

成化十年甲午科

舊志作十一年今正之

周木

御史士良之曾姪孫字近仁號勉思乙

未進士初觀政工部被命往河南爲伊悼王營墓還朝授南京行人司左司副九載考績擢吏

部稽勲司郎中與修 憲宗實錄有白金文綺之賜時 懿祖祧祭公奏言祧祭與常祭不同哀多而樂少乞是日免朝庶精白一心以供祀事再被命往湖廣冊封 岷王會災異 詔求直言公言今天下極弊莫苦于賦役請敕戶禮兵工四部條出諸司大小賦役逐一因革廢置報聞時禮部火下尚書耿裕等于獄公奏言變自天生豈可專咎臣下今尚書等官 皇上所當改容而禮貌者不宜輕置于獄遷浙江布政

司右叅政旬宣郡縣清查軍籍作道南書院修岳武穆廟外艱歸公高自標榜積爲衆忌明年遂奉詔致仕公年四十四而子炯已成進士矣至是家居定周卹宗戚之規冠婚喪祭悉按古禮嘗建言于督學御史戴珊立仲雍祠于山巔名曰清權又于子游祠前別立吳公坊碑及增廣儒學號舍而前是居京朝時上疏請正先師孔子謚號請加李延平封爵陞祀廟廷請賜范文正子孫職銜永奉祭祀又請賜張洪吳訥謚

併從祀子游祠事雖不盡行然俱敦重名教尤  
究心理學所著易心逸說二書闡發易理甚精  
密有功於後學所校輯者如近思錄周元公全  
集延平答問朱丹溪素問糾畧皆日夜校讐而  
爲之序外有奏疏若干卷詞義雅練善古隸弟  
彬病于京師嘗割臂肉爲粥以進竟弗起其孝  
友如此卒年七十二後從祀子游祠邑中理學  
名臣自張吳而下必稱公

近世有國朝史餘是陸天池輯微刺公一二事

而併誣蟻王端毅且謹侮陳白沙甚矣野史  
之失真也

此縣前周氏發科之始後有周炯周滌周懋俱  
舉進士周楷周彬周坦周光宙周光廷俱舉鄉  
薦凡九人父老相傳周氏卽仲雍裔孫

朱穰 庚戌進士字相之任工部主事後割隸

太倉子洸字大武由太倉舉進士孫某舉人

王崇錫 初從賈姓辛丑進士號鶴臯

初任餘姚縣知縣政有芒刃聽閱精審擢南京

廣東道御史尋改北臺被命理福建戎籍立連  
坐法凡以計脫隱者許自實得漏卒無筭再巡  
按江西其俗好訟有黠者代爲訟或昇棺而訴  
于庭不准行不止公痛治之此風少衰止彭蠡  
湖有渡舟其人負險出惡舟入湖需索無藝不  
遂則加虐焉公入境悉捕置于法江西至今以  
爲口實吉有廕仕中朝者與公有夙契其介弟  
怙勢暴鄉里公執之以屬吏竟瘦死獄中浮梁  
有暴豪姻連臺長公按治其不法事如律其不

畏強禦多類此遷山東按察司副使卒于官

此廟巷王氏發科之始後王舜耕王舜漁俱舉  
進士王之夔舉鄉薦

徐澤

字德潤初授順天府平谷縣教諭平谷

近邊境公素好談兵至是撰禦虜安邊策數萬  
言諸生服習其書始知用兵古法以千鎮守大  
臣內艱歸服除再補宜春縣教諭有集若干卷

葉翥

辛丑進士字鍾秀任金華知縣卒于官

後割隸太倉

周楷 木之族弟字民則居支塘由歲貢中式授袁州府同知考績卒于京父滙隱居自適耽玩文史所著有漱石集

蔡宥 號似葵初居雙鳳後徙邑城授袁州府推官性度坦厚折獄明允有治聲

秋雲漢 字天章初居沙頭後徙華蕩由歲貢順天中式授沅江縣知縣沅江朴野易治公以寬靜爲治民皆愛之郊外有佳山無事輒携其妻子出游民率婦子挈果茗候于郊公停輿受之

童豎披輿而行公溫言款慰如家人父子也居任九年調臨清州州判以忤御史致仕爲人耿介不隨俗于進初未第時聚徒講學至百餘人守其師說者多取高第去後解職入山家無長物突屢無煙仍以筆研謀生而終日吟嘯不輟其詩清古絕俗嘗與太倉州守登城遠眺守越人也簞簋不飭公詩有南去好山都入越東來滄海半吞吳之句守但拱手而謝有田僅二十五畝戲自號爲餘夫卒年八十餘有詩集

公以前有桑民懌公以後有吳敬夫俱傑作者  
時目爲鄉科三儁而綜其實當遜狄公

顧邃

字希邃由順天中式初授遂昌縣知縣

轉莘縣遷河間府通判有吏能亦攻詩

馮玘

字良玉號惺菴由鳳陽縣籍中式登辛

丑進士祖居白茆國初謫戍鳳陽子孫遂世戍  
焉至公貴乃還常熟初在鳳陽時家貧無以爲  
生且讀且樵後登第初授河南泌陽知縣首捕  
論豪強梗政者數人後乃收卹貧窮陝右兩河

告凶流民入境公發粟賑之全活甚衆擢監察

御史巡視荊州倉儲會京師大雨壞民廬舍公

劾奏大學士劉吉貪位短喪妒賢嫉能宜加罷

斥以答天譴疏入不報遂出按貴州都勻獠反

戕殺官兵甚衆公再上疏請勦有詔會師討

之歲餘乃平遂郡縣其地還朝再出按浙江時

鎮守中貴恣橫其下席勢害民公按治之中貴

窘亦誣構公上察其詐配之邊徼境內肅然

還朝孝廟遣中使迎胡僧領占竹公極言其不

可 上嘉納之得不召以資當晉京秩自請外  
補遂得福建按察司副使甲子充監試官尋丁  
外艱服除再補福建中書語致仕家居三十年  
織書治家殖業卒年八十一有奏議詩文各若  
干卷子冠舉進士

成化十三年丁酉科

褚垠

璵之子字弘鎮授江西寧縣知縣其俗  
強戾公一切以法繩之民不能堪遂聚黨攻令  
因致仕

楊舫

集之子字弘載授莒州知州莒城崩自  
杞梁之妻哭而嗣築者輒又崩公出奇計復城  
之嘉靖初流賊寇莒堅不能瑕屹然保障公之  
功也復以先賢子夏嘗治莒乃作賢賢堂課博  
士弟子秩滿致仕家居多蓄古書校讎不倦攻  
古文辭有水利書一卷言治水者多按之

周彬

木之弟字近德計偕卒于京例贈通州  
州判嘗營別墅于城北有山池亭館之勝其鄉  
譽甚著有王其者夜遇盜于途盜掠其贊異其

貌問姓氏王詭曰吾常熟周彬也盜驚曰果周  
大人耶歸其所掠而去子光宙解元

聞釗 鑑之從弟字遠明辛丑進士

初授南京大理寺評事進左寺副寺正左遷華  
容知縣卒于官公性嚴峭守法堅正其在大理  
論駁無所阿縱曾按治大璫蔣宗罪遂為所構

云

朱希古 甲辰進士字宗哲任肥城知縣卒于官

陶鸞 字世祥

陳景 由歲貢順天中式字叔輝

成化十六年庚子科

盧翊 琮之子庚戌進士字鳳神號玉渠

初任新喻知縣勵精為治庭無留務內艱歸服

除補獲嘉縣擢監察御史出理山東軍政再巡

按廣西時逆瑾擅國以苛刻取賂會省城火瑾

論公與三司失救罪時公已遷湖廣貪事猶不

免罰又以功冊稽緩為罪罷公官前是公有平

養獲功被錄至瑾敗 上念公前勞賜織綺衣

一雙復前職改任四川南兼視水利天全六  
番招討司所統礮門土軍以重欽作亂蜀中大  
震公招撫之皆詣軍門降遷副使守禦松潘其  
地介于羌戎爲全蜀屏蔽松守卒自成都調分  
諸戍勞逸不均卒怨多逃公爲定更戍法又嚴  
衛長欽索之禁戍卒得免怨苦棧關久廢壞運  
道不通商旅斷絕公調工治之土人名爲盧崖  
關龍州之西有鐵索橋土官叛亂多斷橋以守  
兵不得進公命益其索而上施之板行者稱便  
遷雲南布政司左叅政再遷廣西右布政卒于  
官公久更邊任每事務持重博謀綏輯諸夷不  
勤遠畧得方面之體所著有玉渠稿興利稿都  
江志卒年六十六

沈鼎

字端甫號南洲初授處州府通判屬邑

慶元令周某爲其民訟于監司聚衆圍縣治聲  
傳洵洵欲得而甘心焉公受委行縣衆以紅抹  
首執械聚于道傍公諭以禍福得解散去仍遣  
人護令家屬出境中官以銷鑛餘銀寄州庫中

官死于旁郡典庫以無籍請入焉公不從籍之  
于公憂歸復補南陽府通判致仕

曹文 字孟章居金山授福州府推官以羸疾  
致仕喜爲詩

陳瑜 字德輝由順天中式任中書舍人

成化十九年癸卯科

蘇奎 丁未進士號虞菴

初任新建縣知縣性嚴厲以法操切下吏民畏  
之憂歸復補廣東清遠縣改浙江上虞縣致仕  
治園居廣購載籍掇其要畧會粹成書幾百卷  
多雜聞舊事

蔡坤 甲辰進士字一寧居陸河

少負遠志七歲能爲詩釋褐擢刑科給事中是  
時閣臣萬安學士尹直皆憑寵專恣公疏列其  
罪不報最後李孜省以左道進內侍梁方陳禧  
等相倚爲不法公並論之直聲震一時 孝廟  
登極奉詔如浙江祭禹穴還朝以朝叅失期出  
爲興國州州判遷安順知州安順在南夷公順

其俗爲綏輯民夷安之遷衡州府同知超山西  
按察司僉事兼督河南等處屯田公久踐州寄  
王端毅公居吏部議且內遷而公已得疾不起  
公慷慨喜功名顧仕輒齟齬而靜重有守未嘗  
希內援居官清約至無貲以遺後人

將鈍 綬之子字子礪由順天中式有俊才任  
滑縣教諭

丘雲鶚 賢良方正丘方之孫字世騰號西園授  
江西湖口縣知縣有治才

丁仁 字明德號梅谷己未進士

初授行人尋丁外艱服除補原官陞司正柴薪  
歲折例有羨銀公爲購書千卷度于司中暇則  
披閱記誦最爲淹洽尋被命冊封 慶符王還  
朝陞南京工部屯田司郎中司有蘆洲歲課銀  
二萬五千有奇故事司專出納公視篆白之部  
長請委吏受銀于堂廡郎中無所與擢廣西左  
叅議督糧餉屬歲大歉軍儲缺公轉移調度卒  
以獲濟廣夷多用蠱毒從者爲公危之公恬然

飽食自謂忠信可孚蠻貊也賓州有亂民公使人敦諭遂恇息以賀 聖節入京于朝官一無  
餽遺尋引年致仕卒年八十三爲人純朴端謹  
外若漫不加省而內則涇渭自分家居清約如  
寒士而歲計有贏輒以賙族人之不給者邑有  
義舉必請于長吏行之其文典雅平實邑中墓  
銘多出其手

趙鈇 字民威居東湖陸材任山東澤縣知縣  
負意氣不能爲人下好直言人戲以鐵稱之其

詩亦有才情錢公仁夫稱之曰介如石直如絃  
氣橫秋才湧泉時以爲知言

李應夔 字韶卿初授磁州學正左遷鄆城縣訓  
導父名弗隱居教授工于詩

李嗣賢 栗之子字世英任湖廣湘潭知縣

蔣績 級之弟字洪勳由歲貢順天中式任浙  
江開化知縣

成化二十二年丙午科

聞武 鑑之子字邦憲卒妻顧氏後以節婦

被旌于東昌舉進士亦未仕而卒

馬儒

字良佐號春軒初授汝州西平縣教諭

陞湖廣臨湘知縣以老曠請致仕卒年八十三  
生平負氣槩憂憂辨是非嘗創湖干獨善齋讀  
書其中爲文迥麗藻贍可稱能手好爲人作應  
酬詩文故今人言自薦者必戲曰馬春軒

趙勣

銖之姪字國勳英邁有大志好自標榜

雅志詞墨遺脫世事庚戌計偕已迫試期矣忽  
聞毋計卽悲號慟哭驅車南還時雪深泥濘艱

于輿馬遂徒跣而行人以是稱之久因公車受

蕭山教諭分典山

東鄉試陞福建某縣知縣

陳震

字康伯雲南府通判

須震

字民敬初任齊東縣知縣嘗浚白雲湖

以利民陞南康府通判

瞿剛

字用九由順天中式任嘉定州知州

吳一鵬

癸丑進士字南夫今籍吳縣

由翰林庶吉士授編修滿考進侍講充經筵講

官時中貴人瑾怒公等不時謁用擴充政務調  
遷公南京刑部員外郎轉禮部郎中瑾伏誅公  
仍爲侍講以久次遷行講學士出爲南京國子  
祭酒轉太常寺卿仍南京嘉靖初陞禮部侍郎  
兼翰林學士掌詹事府典內制進尚書予告歸  
省還出理部事再加太子太保南京吏部尚書  
致仕公有器量寬然長者爲文亦典腴有成弘  
間風卒年八十三贈太子太保謚文端子子孝  
曾孫安國俱舉進士 兪州續集

陳訥

字近仁由太倉衛中式

初任江西高安縣教諭陞衢州府學教授

顧潤

字良玉居南京衢州府學教授

范輪

由順天中式甲辰進士字希載南京禮

部主事晉至郎中

楊昇

由順天中式登癸丑進士字啟東今籍

吳縣由翰林庶吉士除給事中

弘治二年己酉科

錢仁夫

己未進士時年五十四字士弘號東湖

居吾里村少有高稟學于邑儒陳九疇聞性理  
之學既登第授工部都水司主事分司臨清領  
衛河提舉司兼理漕渠開事會省冗官兼理磚  
廠還朝改虞衡司北虜入貢羣次鴈門公被推  
攝主客司事再被命監稅浙江還朝晉員外郎  
時逆瑾竊政公知異日必有衣冠之禍遂引疾  
致仕性好客座上常滿嘗爲族人置義庄歲凶  
收瘞齒幣所著有歸閒文纂八卷水部詩曆八  
卷詩和婉有唐人風文雅贍有體裁書法四體

俱善而楷隸尤豐媚適勁大都法李北海而亦  
出入吳興榜署書尤妙畫山水竹石瀟灑動人  
花卉禽魚亦有神采氣韻其在吾邑可稱繪事  
之絕境今好事者爭購之不可得先是公蚤自  
引退不雁逆瑾之禍人稱其明決朝士張郎中  
爲瑾所逮親識無敢往公獨問遣之人稱其節  
槩內行修謹人稱其孝友寬仁至是家居詩人  
騷客爭相還往如沈石田周自相城來俞民度  
憲自梁谿來而同邑則李石城傑從弟五峯公

承德亦謝政家居相與陶情詩酒而家有園亭  
瓌奇幽麗人望之翩翩欲仙所善沈俞二公又  
工法書繪畫之跡封君孫西川艾亦相與游戲  
翰墨自是風流騷雅必稱東湖居士晚年盡度  
詩文原稿納之生壙申名曰詩塚卒年八十五  
嘉靖三年嘗有詔進階得賜肉帛

子璠舉人孫某以豪侈自尊大嘗侮辱一方士  
後方士之友上虞葛公爲常熟令廉得其諸不  
法事逮繫獄遂以破家向所稱錢家倉園林宅  
第變爲荒煙蔓草與其人泯然俱盡悲夫

周炯

木之子庚戌進士字光字號簡默

少徧誦五經嘗撰萬言書言國家大計父抑止  
之不果上旣登第授工部主事監稅浙江晉至  
郎中遷雲南右叅議雲南民夷雜處公一待以  
誠信麗江軍民府爲羈縻郡巡歷所不及巡按  
御史屬公諭下之守邊十八寨久弗靖邊臣議  
征之公持不可所全活甚衆遷右叅政職理戎

伍再督理糧儲兼理鹺法剷除奸弊甚多外艱  
歸服除補原官轉陝西苑馬寺卿遷山西右布  
政使轉左內艱歸卒有遺文四卷

周滌

炯之族已未進士字進之號東郭

初授刑部主事慮囚淮南晉至郎中持法頗峻  
操下如束濕司吏董某積不能堪誣告公賍私  
下獄勘問遂罷官公有吏才仕既不得志退而  
治生享有君閒之樂弟姪籍其庇者俱得生殖  
致富

秦慶

蕃之族字廷善任南豐知縣

胡恩

字天與河南布政司理問

褚圻

輿之子字弘望癸丑進士居金山

初授刑部主事晉至郎中多所平反以明允稱  
遷寧波府知府寧波瀕海歲時倭舶往來夷黠  
而肆公在郡戢不敢動遷廣西按察司副使尋  
致仕友于兄弟有恩于族屬

時中

由大興籍順天中式庚戌進士字大本

號庸齋先世以役籍大興至公貴乃還常熟初

任山西絳州知州陞南京刑部員外累辨在抑  
憂歸服除補原官遷山西按察司僉事提督屯  
種左遷衡州府通判陞嚴州府同知再復舊職  
飭廣東清遠兵備徭種寇連州公率兵討平之  
晉副使領海南兵備治尚清嚴所至有治績居  
家有倫行子春秋夏俱舉鄉薦次兩貢生族人  
通嘉靖庚戌科進士亦仕至按察司副使

周忠 字世臣祖戍金齒中雲南解元或云亦  
木之族

弘治五年壬子科

鄒韶

癸丑進士字性之號穀城

初任南京工部虞衡司主事虞衡有蘆鈔多吏  
弊公訪而革之督磚運于儀真運者樂其不擾  
晉南京刑部員外擢吏部稽勲司郎中遷兗州  
府知府究故劇郡訟牒紛委而公剖決如流逆  
瑾亂政遣卒四出偵事取賂公遂懇疏致仕初  
瑾欲逮公而公得請去乃摘以二罪俾以米贖  
不嫌復加譴俾再贖已而瑾敗得免久之廷臣

疏中外臣僚爲瑾逐去者公名在列有旨擢山東左叅政命下而公卒矣

顧達

乙丑進士時年六十矣字德孚

初授江西臨川知縣有縣尉申某以旁戶納賄公杜之某行謗于監司調龍泉縣教諭尋遷魯山知縣再遷南京刑部主事持法平恕多脫人于冤抑以年至請致仕進郎中歸卒年七十一

顧守元

癸丑進士任中書舍人後割隸太倉

連憲

恭之孫字成章豪爽負氣好面折人

顧梗

字大用任遂安縣知縣

章洗

儀之子字明之任江夏知縣卒于官

陸隆恩

潤之子字晉卿初授浮梁知縣縣歲供

斃器主者緣爲奸利民苦之公上疏請停中人

督造報聞改江夏縣時藩府奉御撻殺大賈

某其家訴于朝公被命往覈卒正奉御罪遷南

京後軍都督府都事未上尋寸憂服除改北府

遷前軍都督府經歷尋遷福建鹽運司同知卒

于官

劉倣

茲之從弟號宜杏由順天中式

初任浙江壽昌知縣調繁定海縣

弘治八年乙卯科

蔣欽

丙辰進士字子修號自新綬之姪

初任衛輝府推官擢南京山西道御史直聲震

一時正德初內侍劉瑾馬永成魏彬傳興羅祥

谷大用等蠱惑上心八虎橫三老詘而瑾尤狎

牙其間公與南京給事中戴銑等御史薄彥徽

等具疏言劉健謝遷先朝元老不宜輕去又言

上晏朝廢學與六七內臣新進佞幸遊宴馳驅

射獵等事伏望收回成命着劉健謝遷仍與李

東陽照舊管事以抑權奸上大怒着錦衣緹騎

賫詔解扭到京杖之闕下公受杖三十削籍爲

民再上疏專劾逆瑾貪賄鬻爵生殺予奪大權

一歸于瑾所在重足屏息寃號之聲徹于天地

累朝成憲變易幾盡而陛下若罔聞知亦何

面目立于天地間乎因請殺瑾以謝天下再殺

臣以謝瑾其詞懇直至有臣子不忍言者有

旨再杖三十下鎮撫司獄蓋是時已血肉淋漓  
濱于九死仍再上疏言瑾在朝廷猶祿山之在  
唐秦檜之在宋 陛下何仇于臣何恩于瑾而  
不寬之重典哉臣今皮肉都消涕泗交作七十  
餘年老親不得復顧當與龍逢比干同遊地下  
不與逆賊同立朝廷有 旨再杖三十着錦衣  
衛拿問前後凡三受杖纔半月耳不勝創甚遂  
死之公既死瑾猶矯詔榜奸黨于朝堂而公名  
在焉迨瑾凌遲處死 上他日惜公忠爲下卹

典贈光祿寺少卿錄一子入太學

公父名綺號瞻梓喜爲詩文沉鬱有密致公雖  
被禍而翁處之泰然鄉望甚尊卒年九十六

吳堂

訥之曾孫已未進士字子升號虞東

初投保定府蠡縣知縣擢監察御史清戎江西  
時逆藩宸濠結納劉瑾請復天順中所革護衛  
軍屯田及乞自造兵器朝臣皆畏瑾威不敢抑  
公獨抗言危論宸濠爲之氣懾正德五年劉七  
橫行山東攻陷城邑 上命少司馬陸完伏羌

伯毛銳討之公監臨其軍有節制得麒麟袍之賜遷大理寺丞進右少卿時江彬被寵欲誘

上開邊囂上將再幸榆林宣府百官號泣諫

公大聲隨之上怒調公雲南鶴慶府知府鶴

慶之俗尚佛鎔金爲大士像奉之公曰佛寺輝

煌如此而文廟傾圮聖賢顧出夷鬼下耶遂銷

其金立學宮一郡向風嘉靖初詔召故諫巡幸

者還中朝行且柄用公而公上章乞骸骨得以

原職少卿致仕卒年七十二由文恪公以來三

公俱曾爲御史

楊公儀撰誌

陳播

裔出古靈陳先生後其先福建侯官人

至宋而有名儒諱元大者徙居常熟公其九世

孫也謁選得慈谿縣教諭談說經義諸生俱愛

敬之邑人禱公圻爲寧波郡守素與公善而公

自旅見外絕無所關說內艱歸服除赴京卒于

魚臺祀名宦鄉賢字中定學者稱爲靜成先生

公父名德容貢生子迨曾孫國華俱舉進士國

華子星樞舉鄉薦又孫官玄孫大亮俱貢生凡

六世科貢

吳寅

字敬夫初授武昌府同知兩丁憂補常

德府再補襄陽府遷河南鹽運司同知居官清

約文辭敏贍

郁勳

容之子丙辰進士後割隸太倉

初授華容知縣父僉憲公為澧州知州相去二

百里時遺書以訓之公蒞官亦清謹卒于官當

公之卒也僉憲公方移官滇上而祖母沈太宜

人尚在母張宜人留侍旅櫬歸祖母母妻及子

凡四世哭公見者為之酸鼻子各遵號右泉贅

于劉後有長女適少司馬王惇生大司寇世貞

而遵永壽一人之身而前及見祖父兩世進士

後及見壻與甥兩世進士亦奇事也

王槐

字公甫初授湘陰知縣遷安陸州知州

時世廟入朝踐阼公扈從供億百需皆立具

及上迎皇太后就天下養公供備如初以

治績遷順天府治中南郊被命分獻南鎮上疏

乞歸省不許卒于宦陰一子數人謂公少須臾

毋死九卿豈足道哉

蔡楨 字思周

陳言 丙辰進士字汝昌號東麓

初任刑部主事慮囚三輔晉至郎中案無留牘  
獄無冤滯丁二艱服除改兵部尋遷撫州府知  
府多惠政有劇寇艾茹七等作亂 詔都御史

陳公金討之檄公參預戎事寇平當遷秩會有  
据言路者以私憾劾公遂致仕撫州立生祠祀  
之有四美八奇之咏焉卒年八十一 朱公希周撰志

桑翹 瑾之子字民起初授江西萬安知縣邑  
城久廢自公城之遷泉州府通判亦攻古文辭  
所著有寒青集

弘治十一年戊午科

王錫 字與弼任嶧縣知縣

唐天恩 元之孫字堯仁號春宇初授河南葉縣  
知縣時盜起河朔公增城塹池繕修器械流賊  
趙璲徐彥明等哨馬千餘臨城公率兵奮戰擒  
數十人戮之賊引去後劇盜劉七擁眾壓境勢

尤猖獗攻城甚急公嬰城固守二十餘日外無  
強援城遂陷賊執公併公父政殺之處母任氏  
併二妹二子一門七口父子祖孫同時被害事  
聞 詔贈光祿寺少卿諭祭崇祀鄉賢蔭一子  
仍賜子孫爲儒籍復其身無有所與後巡按御  
史華珩題請 勅建專祠在慧日寺西扁曰唐  
忠臣祠後人不知者過祠下誤指爲張睢陽然  
其事與睢陽絕相類  
蔭子名應侯號小字以赴選卒于京

顧欽

潤之子居南京任福寧州知州卒于官

呂祚

字慶之號中村居五渠授浙

江麗水縣知縣其俗厚嫁以故產女多不舉公  
痛禁之全活甚衆以年致仕卒年七十九

周坤

字順中戊辰進士居雙鳳後割隸太倉

初任工部主事晉至郎中遷寧波府知府致仕

兄弟十人周在周土周坤周墨俱舉進士周塾

周塾俱舉鄉薦從子鐸舉進士從孫渤舉鄉薦

陶成

字君美

弘治十四年辛酉科

陳察

亞魁壬戌進士字原習號虞山

初任南昌府推官擢監察御史尋召治臺事宦  
官劉瑾擅命引妖僧蠱上公率同列痛哭極言  
之詔繫治罰粟百五十石輸邊始釋瑾既殊死  
而義子寧彬煽起益甚公疏爭之不得遂移疾  
歸又九歲起守故官值宸濠反江彬說上親  
征因以探南方名勝公抗言此不過一帥任而  
柰何屈萬乘尊且燕中無六尺可寄撫監不北

憂虜內憂蕭牆耶

上不憚切責公奪一歲俸

出按雲南屏騶從躬行箐棘間微刺民間得失  
而按劾墨吏若仇滇中故有銀礦奄人乘勢苛  
取之公持不可竟罷議金齒帥沐崧挾中貴人  
爲貪橫亂吏治公窮治其黨如律時上無子  
公疏請建儲不報世宗卽位下詔求直言公  
還朝上書請篤聖志崇聖德復出按四川請罷  
鎮守及織造內使內使銜之次骨其後上次  
第有所裁具如公語內艱歸服除再入爲御史

而千戶王邦奇事起邦奇以罷任緣上意誣大學士費宏等給事中楊言紆之上謂爲大臣游說恚甚廷鞠言備五毒公忽大呼曰臣察願代楊言死上目攝公不爲動退復奏書極論之上竟寬楊言獄弗誅營帥郭勛挾上寵爲姦利巨萬公時監軍事發其陰請賜罷上不得已令勛以候就第未幾遷太僕少卿公疏辭且薦代人太僕于故事不得辭又不當薦代遂謫潮州府學教授復移信州府通判起拜浙江按察司僉事晉副使再遷山西按察使尋遷山東右布政使再遷浙江左布政使入爲光祿寺卿改都察院左僉都御史提督南贛汀漳軍務蒞任祖王文成公爲治盜賊屏跡日惟布袍蔬食不知肉味嘗爲子延師官印命吏市一鴨卵剖分爲四以二供師以一自啖以一啖二子贛人至今傳說之居下何乞骸骨歸監司守令過從者時出麥飯飯之又多作吳語刺刺是非不少借後進謁公者少有能得公色相率指摘公謂爲

吊詭然公為名臣為直臣天下想聞風采今父老兒童每談氣節事必稱說陳都憲陳都憲云公老病嘗捐私田三百為助博士弟子貧者卒年八十三有集及奏草若干卷蔭一子亮勳弟寰舉進士寰之曾孫繩武舉鄉薦

徐南州 字子高任江陵知縣

錢承業 承德之從弟字世廣任高唐州學正

王良翰 乙丑進士字仲申任工部主事監稅稅

州尋引疾致仕

聞韶 鑑之子任建寧府同知卒于官

朱寅 辛未進士號古愚祖居橫瀝塘至公父

慎齋始徙居邑城公初任吉水知縣用法嚴峻民皆悚息吉水故無城公至而築之擢工部主事理山東泉源以疾歸子木舉進士

何宗海 字景清

錢炯 字若鑑任蘭谿知縣

弘治十七年甲子科

張文麟 懋之孫第五名經魁乙丑進士字公瑞

號端巖是時當修 孝宗實錄采故事諸錄高  
第選者馳傳行郡邑公得浙江還上事太史遂  
授刑部主事所治金吾提騎一以惠文彈治之  
遂治尚書章奏尋與同舍郎共治逆瑾獄所傳  
爰書最稱明允晉至郎中南海梁次攄者係宰  
相子多賊殺良民公奉璽書往勘竟効抵罪遷  
吉安府知府未上丁外艱服除補建寧府免官  
歸年僅三十八耳于是居積致富推其餘以贍  
族屬而尚多美則起三大第使三子分居之鱗

次櫛比沼館花木臚整幽靚所居巷名曰步道

巷邑中言膏華者稱焉

王公世貞撰志

鄒武

韶之弟字靖之號近齋初授邵武府同

知陞南京刑部員外晉郎中遷漳州府知府致  
仕卒後入鄉賢祠

陳復

字一陽號一鶴初授浙江長興知縣改

江西大庾縣遷韶州府通判致仕生平沉篤慈  
信居官亦多惠政子諫孫瓚俱舉進士曾孫禹  
謨舉鄉薦凡四世

姚奎 字天章初授湖州府通判爲御史所按  
久之得解改調東昌府遷太僕寺寺丞性故喜  
言民利病時新置太倉州公疏論太倉之置有  
數害請革州以惠東南之民事下蘇州卒爲群  
議所阻尋致仕

湯繼文

孫之孫字引之辛未進士號前川

初任南京兵部武選司主事遷職方司員外尋  
遷武選司郎中陞福建左叅議分守建寧諸郡  
事閩歲大稜軍儲告缺有 詔蠲民租適有秋

省臣議變通法將加徵焉公謂朝廷德意不可  
虛而軍儲當別措卒如其議民德之長樂有紫  
陽書院爲邑豪所據公按故址勒還置其人于  
理遷湖廣按察司副使分巡湖南道卒于衡州  
居官植節槩勵廉耻旅襯歸貧無以葬家有五  
喪未舉得同年丁奉致書巡撫歐陽鐸歐陽用  
賻儀相助始克舉時有同年輓詩云俗薄心逾  
古家貧行轉廉蓋實錄云

陳瑛

由順天中式任某府通判

朱表

由歲貢中式字民望乙丑進士居塗松

鎮後割隸太倉初任某縣知縣擢刑部主事晉

員外郎卒

舊志誤係戊午科今正之

科第志上卷終